

來去讀書

A: 秦愛耍

B: 秦認真

A: 透早就出門，天色漸漸光，受苦無人問，行到學校門（唱）

B: 勢早心情袂耪呢！「好聽！好聽！-----三房兩廳。」

A: 無咧 逐工心情好啦！

B: 耶！按怎，昨暝睡無飽喔！目睭敢有掛烏輪，較緊共精神提出來，共大家問好。

A: 秦愛耍 & B: 秦認真，上台行禮

A: 噯！煞毋知七早八早就予阮阿母叫起來讀冊。

B: 今，今仔日欲考試，「領頸生瘤----拄著啊」！阮昨暝只好「十二月尿桶----盡拚」，

A: 免遐認真啦！讀冊，讀冊是愈讀愈感！

B: 無 nòo，毋管「三更火，五更雞」愛拍拚才有出頭的機會。

A: 彼數學！莫講我看無，連阮阿母嘛袂曉算，真正是---唉！

B: 你真正是「苦瓜燉鯪魚---苦憐。」

A: 閣有什麼 abc 狗咬豬！我抑無欲出國提第一，管伊去 Do、Re、Mi

B: 頂回英語是考外濟？你嘛報予我知。

A: 阿----阿----干焦 5 8。

B: 你喔，「胡蠅戴龍眼殼，蓋頭蓋面。」kann 知影欲耍。

A: 你才古井水蛙（ke）！敢知-----我有外勢。

B: 你是猴。

A: 唬！毋是啦！

B: 虎！是蹠佇山頂。

A: 你臭耳聾勢翻話。

B：人講：歟雞胗是免本錢，請---講兩項仔來聞芳咧。

A：我逐下晝攞去拍乒乓，毋是我咧膨風，看我的姿勢就知影我有外威風。

B：真正是「鳥干仔貯豆油----看袂出。」你閣有一手好工夫。

A：人講：「荏荏馬嘛有一步踢！」莫看貓無點。

B：共你褒兩句呀！你就尾溜翹上天。

A：我閣有著過獎呢！

B：啥物！著過『辣椒醬、沙茶醬』

A：喂、喂、喂！耳空搯予利，跤馬徙予在，我全校比賽是佇三名內。

B：我共你拍撲仔兼放炮；毋知猶有啥物齣頭。

A：嘿、嘿！我老和尚「老罔老，猶閣會哺土豆」，（手提布尪仔來搬弄）搬戲弄曲我上勢。

B：啥貨！彼阿公講的黃俊雄布袋戲你抑會，真正是有眼不識太山，失敬、失敬。

A：「講予你捌，喙鬚就好拍結，」本土藝術就愛顧，文化發揚來維護。

B：人講：「行行出狀元」，愛多元的學習，毋閣嘛無法度逐項攞提第一。

A：嬌喔！按呢講毋才差不多，彼風颭有時抑會轉回南。

B：學校予咱有真濟學習的機會，咱就愛逐工歡喜來讀冊，俗語講：「魚著趁鮮，人著趁茈。」

A：是、是、是！「一人一雙箸，欲夾無仝味。」語文、數學、自然逐項有。

B：社會、生活、體育真好耍

A：社團趣味樂逍遙，做伙學習會變巧。

B：下課拍球滿滿是，笑聲喝咻無底比。

A：khit 砵板、幌韃鞦我攞會。

B：覘相揣、走相逐耍袂瘡。

A：朋友交陪來做伙，互相免勵毋是假。

B：老師耐心有撇步，照顧子弟人呵咾。

A & B：阮欲逐工歡喜來讀冊，再會。

A：秦愛耍 & B：秦認真，落台行禮。